

朱子大全

冊九

晦庵先生朱文公文集卷第十七

奏狀

奏衢州守臣李嶧不留意荒政狀

臣昨蒙賜對輒論州縣檢放災傷不實之弊伏蒙聖慈開納卽降睿旨令臣詢訪不實最多去處按劾施行臣恭稟聖訓伏自到任卽行詢訪大抵本路被災諸郡檢放分數多不盡實而衢州尤甚蓋自去歲大水之後知州事朝散郎李嶧專務掩蔽不以實聞及轉運司訪聞差官驗問既得其實反爲李嶧執稱無水而其親戚方在政路曲爲主張遂再下提刑司體究欲以遂其姦詐幸所差官不肯曲從方欲具以實聞又爲李嶧生事把持至今未竟及旣遭旱嶧又妄申諸司稱民不闕食未至流移後來甚不得已然後差官檢視所差之官受其風旨早田之旱例不爲檢

晚田又不盡實如常山一縣被災最甚通計無慮七八分而嶧乃只作一分六釐減放至開化縣被災不減常山而其所放則又僅及一釐一毫而已臣今行視兩縣之境水痕尙存高岸民居皆至半壁山谷之人採取蕨根以充飢腸羸瘦萎黃非復人貌歲前雨寒死亡已多而李嶧恬然略不加恤對臣依舊隱諱堅執舊說其於荒政全不留意但知一味差人下縣督責財賦急如星火所蒙聖恩撥賜米斛共六萬石不爲不多而至今日久並不科撥下縣亦不曉諭民間諸縣官吏尙有初不聞者況於窮民何緣得知聖主天地涵育之恩加以病昏不能視履百度廢弛不成州郡不但檢放不實荒政不修而已也臣旣奉聖訓詢訪見得上件事理不敢緘默以負委寄敢昧萬死按劾以聞伏惟聖慈早賜處分

四 奏請畫一事件狀

臣今有合具奏請事件謹具下項

一 臣昨爲紹興府米斛有限飢民日衆向後日月尙遠竊恐無以接續糶濟仰貽宵旰之憂曾具奏聞乞再給會子三十萬貫及盡推去年賞典半減度牒米數至今日久未奉進止今到衢婺見得兩州元係災傷稍輕去處而糶濟之備可接初秋紹興係災傷最重去處而糶濟之備反不能盡春月將來青黃未接必致狼狽無可疑者欲望聖慈檢臣前奏早賜處分庶幾有以接續糶濟不棄前功不勝幸甚

一 臣昨到婺州爲見豪戶脩職郎朱熙績不伏糶米抵拒官司曾具奏聞乞賜行遣今據婺州申到本人居鄉豪橫不法事件條目猥多不敢復具奏聞已條具

申尙書省去訖其人多貲力能使鬼伏乞睿斷早賜施行不勝幸甚

一臣昨準尙書省劄子勘會已降指揮行下江浙兩淮旱傷州縣將第四第五等戶今年以前應干殘欠苗稅丁錢並特住催及將官私債負權免理還其流移人拖欠官物亦與除豁不得令保正長代納并支撥米斛通行賑濟謹已卽時行下州縣遵守施行去訖續據紹興府新昌縣申今年以前未委是淳熙七年官物或是淳熙八年二稅臣亦已申省欲乞明降指揮未奉回降今來巡歷見得州縣奉行果是互有不
同蓋有以今年以前爲七年者則八年四等五等夏秋殘欠依舊催理有以今年以前爲八年者則八年四等五等夏秋殘欠悉已住催蓋緣本文未明致此

差互臣亦未能別其是非然竊以謂治財思子寧過於厚渙汗之號有出無反欲望聖慈明降指揮將八年四等五等殘欠併行住催仍乞令臣督其奉行不如法者庶幾雨露之澤均一霑被不勝幸甚

一衢州守倅並各任滿在卽欲乞特降指揮催促已差下人前來赴任

奏張大聲孫孜檢放旱傷不實狀

臣昨蒙賜對奏論州縣檢放不實令臣詢訪最多處按効臣詢訪得本路州縣檢放類多不實而衢州爲甚衢州檢放旣多不實而開化一縣又爲尤甚已節次奏聞外今取會到本州元差監戶部贍軍酒庫成忠郎張大聲前去檢視及差龍遊縣丞從政郎孫孜覈實逐官自當從實檢視減放卻乃觀望本州守臣意指不以恤民爲念不曾逐一

親詣田頭檢視輒敢欺罔滅裂將七八分以上災傷作一釐一毫八絲六忽檢放是致被災人戶困於輸納追呼監繫決罰之苦流移四出而貧下之民無從得食歲前寒雨死亡甚衆有傷聖朝子育黎元救恤災患之意逐人委是難以存留在任欲望聖慈特降睿旨將張大聲孫孜並行重賜黜責以爲日後附下罔上慢法害民之戒

乞賜鑄削狀

臣昨以職事橫被中傷伏蒙聖明特賜臨照謹已遵稟復還紹興府界竊見諸暨縣災傷至重疾疫大作民之羸瘠死亡者已不勝數由臣前日聞命之際震恐猝迫輕去職守有失照管目今雖已一面多方措置收拾救濟然前日之旱已在不赦之域加以蹤跡孤危風采銷奪竊恐無以號令州縣卒副使令顧獨惟念飢民生死之命在此數日

之間恐勤宸慮未敢再乞賜罷只乞聖慈且將臣見在官職先次鑄削候救荒結局日別行竄責庶允公議

乞給降官會等事仍將山陰等縣下戶夏稅秋苗
百貫丁錢並行住催狀

臣恭被聖恩復抵官次今有職事須至奏聞謹具下項

一臣自衢婺州復回紹興府界竊見衢婺災傷比之紹興分數殊少而兩州公私本皆富實賑恤之備足至秋成惟紹興府災傷極重所費不貲目今已是非常狼狽而考其後日之備乃不能盡三月而止竊恐新麥未登之際尙有闕乏之患而下田之麥亦有遭雨浸損去處又已無復食新之望其豐熟處常歲所收亦不過可爲兩月之計五六月間青黃未接之際此必復有以勞聖慮者若至其時方作處置竊恐復有

緩不及事之歎如欲及今講究早爲措畫則臣昨累具奏所乞數事今皆尙可行也其一乞推去年獻助之賞者已蒙節次施行近日遂有婺州進士陳夔詰臣投狀陳乞獻助二千五百石訪聞浦江等縣更有二三家亦欲陳獻此亦可見不吝恩賞之效今若更賜指揮催促省部盡行推賞使無一戶之遺然後鏤板開具頒下諸州廣行曉諭則其慕而效之者當不止此而已也其二乞減度牒米數亦已蒙減五十石此則恐所減太少未足多致米斛蓋度牒本價止四百貫適今之宜更合少損以濟飢民乃爲得策不當反高其直使曠日持久卒無所售以誤指準也其三則臣嘗與帥臣王希呂同奏再乞撥賜錢會三十萬貫而未蒙開允也此固無厭之請宜不足聽然紹興

之民不幸罹此非常之災父老相傳以爲數十百年所未嘗有而陛下所以扶持救恤恩勤備至亦數十百年所未嘗有今其不能免於死亡捐棄者已無可言其幸得延殘息以至今日者豈可不爲終惠之計而使之旬月之間頓至闕絕以棄前日之功哉抑官會出於印造非有鼓鑄之勞見今通行輕重之權與見錢等雖使更散三數十萬亦未遽有害於流通也況以陛下之至仁至聖夫豈有愛於此而輕百萬人之命哉且又紹興累年荒歉常平錢米日下支散無復一文一粒可爲將來久遠之備今此所乞若蒙聖慈依數撥賜則亦非惟可救目前之急萬一支遣不盡又足以接續收糴更爲後日之儲其利尤不細也凡此三者乞留聖念早賜施行庶幾緩急不至誤事

然臣尙慮麥前急闕收糴未辦獻助不多有失調救
竊見本路諸州常平義倉米斛尙有餘剩未支遣處
欲乞特降指揮許臣照應移用條法量行取撥尤爲
利便

一臣昨具奏乞照應元降指揮明降睿旨住催淳熙八
年四等五等殘欠官物未蒙施行而後來戶部勘當
止將淳熙七年終殘欠住催於是州縣日前雖已將
八年秋米住催者皆復追催其未放者則其催督愈
益嚴峻臣於此時適以俟臯不敢復有陳論然竊獨
病其深失朝廷命令之體其後乃聞軍器監主簿李
嘉言請以臨安餘杭兩縣四五等戶八年苗稅比附
徽饒州例亦行住催而陛下可之則又有以知凡此
戶部之所行者皆非陛下之本心也蓋所謂四等五

四等戶者非他也乃今日蒙被糶濟之飢民陛下所爲
劉參焦心勞思傾困倒廩而拯之於溝壑之中者也夫以
民夫救之如此其悉而猶常慮其有所未至其肯使州縣
科市之吏追呼禁繫加以箠撻而速其死亡也哉況今本
未結路災傷紹興爲甚比之徽饒兩州臨安餘杭兩縣事
食養體有甚不侔者若蒙矜憐出自聖意特降指揮將紹
興府山陰會稽嵊縣諸暨蕭山五縣四等五等戶夏
秋稅秋苗丁錢並與住催其餘諸州縣逐都檢放旱傷
主粟及五分以上者五等戶亦與住催七分以上者并四
業今等戶並與住催候秋成日併行帶納則初不失縣官
之幸之入而足以少寬飢民目下之迫免致流移死損不
勝幸甚

朱子大全文十七
六
一中華書局聚

照對紹興府諸縣去歲水旱相仍田禾損傷人民飢餓幸賴聖恩給賜錢米廣行賑救以至今日二麥旣已成熟民之幸免於死亡者亦稍蘇息全籍官司存恤休養方可安業今不住據屬縣第四第五等人戶列狀陳稱災傷之餘生理未復竊恐和買役錢夏稅綿絹準例起催乞特與具奏放免一年臣照得人戶夏稅綿絹係是朝廷常賦難以放免外惟是起催省限在五月十五日竊見下戶今春乏食養蠶甚少二麥雖熟亦只得供給口食尙慮將來青黃未接更有闕食之患所有稻田又方蒙聖恩借給秧本始得布種向去早禾成熟尙遠若或依限便行起催竊慮細民未有可以送納不免追呼之擾卻致逃移欲望聖慈特降睿旨將紹興府最荒蕭山諸暨嵎縣會稽山陰五縣第四第五等戶合納今年夏稅和買役錢與展限兩月起催

庶幾新穀成熟之時可以送納所有上三等入戶自從常年條限催理如蒙開允從臣所乞則上既不虧縣官經常之費下可少安飢餓羸困之人誠爲兩便

乞住催被災州縣積年舊欠狀

具位臣朱熹

臣伏覩四月二十二日聖旨指揮紹興府蕭山諸暨會稽山陰嵊縣五縣并嚴州諸縣各爲去年水旱最甚可將第四第五等人戶合納今年夏稅和買役錢並特與展限兩月起催內有願依條限送納之人聽從其便仰見陛下愛育黎元天地父母之意臣竊慮州縣奉行不虔仰稽睿澤卽已鏤版多印小榜散下紹興府五縣曉示去訖臣訪聞本路被災州縣知通令佐多有只見蠶麥稍熟便謂民力已蘇遽於此時催理積年舊欠上下

相乘轉相督促使斯民方幸脫於溝壑之憂而一旦便
罹追呼決撻囚繫之苦甚可哀痛況今疫氣盛行十室
九病呻吟哭泣之聲所不忍聞豈堪官吏更加殘擾臣
雖已行下諸州及通判約束外尙慮未能禁戢欲望聖
慈特降指揮令被災最重州縣如紹興府衢婺州且據
今年合納官物照應三限條法勸諭人戶及時送納其
積年舊欠直候秋冬收成之後逐料帶催庶幾飢餓餘
民得以存活其溫台等州去年災傷雖不至甚然亦不
爲樂歲并乞同此指揮戒飭官吏不得意外生事妄有
搔擾則一路生民蒙被德澤不勝幸甚臣以狂妄曲荷
優容偶有所聞不敢不奏累瀆天威臣無任戰栗俟臯
之至須至奏聞者

右謹錄奏聞伏候勅旨

乞推賞獻助人狀

臣昨具奏乞依前點檢台州措置賑濟官耿延年所奏將本路獻助糴濟米人戶比乾道七年糴濟賞格特減米數之半優與推賞已蒙聖恩開允特降指揮依臣所乞將諸路州縣人戶願出米穀自行般運前來紹興府糴濟減半推賞臣當卽恭稟施行節次勸諭到婺州進士陳夔等各赴本司及紹興府入狀情願獻助米斛本司與紹興府各已差官交量或已就行散給去訖臣已與安撫轉運司連名具狀申尙書省及戶部乞依乾道七年及淳熙八年十月二月十三日指揮推賞外今來竊恐有司將同常事未卽推恩致使失信本人無以激勸來者欲望聖慈特降睿旨依已降指揮將陳夔等特補合得官資庶幾有以取信於民將來或有災傷易爲勸諭實爲利便開具逐人所獻米

數合補官資畫一下項

婺州金華縣進士陳夔獻米二千五百石準淳熙八年

十二月十三日指揮合補迪功郎

婺州浦江縣進士鄭良裔獻米二千石準淳熙八年十

二月十三日指揮合補上州文學

婺州東陽縣進士賈大圭獻米二千石準淳熙八年十

二月十三日指揮合補上州文學

處州縉雲縣進士詹玠獻米二千五百石準淳熙八年

十二月十三日指揮合補迪功郎

奏衢州官吏擅支常平義倉米狀

照對臣昨據衢州知州朝奉大夫沈密一申今年二月二十一日到任適當荒歉之後財計匱乏別無可以措置已申明朝廷乞於豐儲倉內更給助米二萬石以濟支遣本

州四月合散官兵米四千餘石未有指擬逐急於常平義倉米內權行借兌合有擅支之罪除已具奏乞賜處分施行外申本司照會本司契勘衢州見管常平義倉米數不多其災傷之餘尙慮新陳未接之際細民闕食準擬接濟糴設欲借兌自合申聞朝廷聽候回降又不聞本司知覺輒行擅借四千餘石支散官兵有違條法遂申尙書省乞劄下根究監勒本州擅支借官吏照數補還元舊窠名椿管去後又據衢州申再行借兌義倉米支散五月分官兵糧米本司契勘衢州設有欠闕卽合措置於別色米斛應副今來本路州軍見管常平米數不多本司尙且申奏朝廷乞給降錢會收糴若或容令州縣違法侵撥萬一不測有誤指擬再具申尙書省乞賜敷奏依法施行如是本州軍糧委實欠闕卽乞別行應副去後未蒙劄下近覩已

降指揮衢州守臣已行放罪臣伏緣在法義倉穀唯充賑給不得他用卽擅支借移用以違制論臣竊惟常平之法所以準備災傷廣行賑給民命所係利害非輕所以祖宗以來立法之嚴至於如此而議者不以爲過以爲久長緩急之計非苟徇目前姑息之私者所能知也今衢州當職官不能計度軍儲應副支遣而坐指常平儲蓄之備以爲一時之用雖原其情實未必有他情弊而隳廢法度耗散儲蓄漸不可長故臣昨來不欲便具奏劾只具狀申尙書省乞與敷奏依法施行意謂朝廷必須薄行責罰以戒後來今乃一無所問亦不略行戒約卽在本司何以約束諸郡況今來旱勢已成衢州尤甚昨日有轉運司差出官員自彼回來說城中米價已是七十文足一升兼本州水路淺澁卒難般運他處米斛將來糴濟全仰見管常平義倉

米斛尤宜愛惜不可違法妄有侵耗欲望將本州當職官吏略加責罰或念其委實欠闕軍糧卽乞朝廷別行應副嚴行約束今後不得輒將常平官物妄有侵支實爲久遠之利伏候勅旨

奏蝗蟲傷稼狀

簽黃

奏爲紹興府會稽縣廣孝鄉蝗蟲入境臣親到地頭田間看視委有咬傷稻苗今與知紹興府王希呂詢訪祈禱打撲焚瘞奏聞事

具位臣朱熹

臣昨於今月初四日聞得紹興府會稽縣蝗蟲頗多卽遣人走探昨已據所差人孫勝回報會稽縣白塔寺相對東山下有蝗蟲數多收拾得大者一籃小者一袋其

地頭村人皆稱蝗蟲遇夜食稻臣已具事狀并大小蝗蟲二色申尙書省乞賜敷奏去訖臣遂卽時乘舡出門向曉至蝗蟲地頭廣孝鄉第十都第十七都同會稽令尉步行親到田間看視其蟲大者不多小者無數集於稻苗之上其未結實者莖葉皆爲咬傷其已結實者穀苗皆爲咬落委是爲災有害苗稼紹興府先已支錢一百貫文付會稽縣募人打撲赴官埋瘞本司亦已支錢一百貫文付縣添貼收買據本縣申兩日內已買到七石三斗八升五合臣亦與帥臣王希呂一面詢究祈禱打撲焚瘞外須至奏聞者

右謹錄奏聞謹奏

御筆回奏狀

御筆

覽奏知紹興府界蝗頗爲災朕心憂懼今不欲專遣使人降香二合付卿等宜卽虔潔分詣祈禱又聞蝗之小者滋育甚多可更支賞召人收捕務速殄滅毋使遺種以爲異日之害故茲札示當體至懷

具位臣朱熹

臣昨具奏紹興府會稽縣廣孝鄉蝗蟲臣已同本府發錢專令本縣令尉親在地頭召人捕獲收買焚埋每得大者一斗給錢一百文小者每升給錢五十文續奉御札令臣分詣祈禱更行支賞召人收捕務速殄滅臣恭稟聖訓夙夜不遑卽同帥臣王希呂就府治設醮祈禳又發錢出榜曉諭於先支賞錢之外更行倍加增貼召人收捕仍差茶鹽司幹辦公事沈大雅前去監視督責及敦請鄉官二員同縣官分頭給賞收捕今據申到截

今月十三日通計收到大蟲一石五斗三升六合小蟲二十五石九斗三升九合並已埋瘞目今尙有一分以
上未至盡絕臣續又見諸暨縣寄居與投詞人稱紫巖
鄉亦有飛蝗在境臣卽已專委本縣令佐親臨田陌子
細從實相視如委的實卽從會稽縣所行召人支賞收
捕焚埋去外臣伏爲本路所管衢婺等六州今歲旱損
比之紹興其災尤甚本欲取本月上旬起離前往親行
檢視預備賑恤正緣收捕蝗蟲未盡未得起發今不佳
據逐州縣接續申到事理委是大段緊急不免定取十
五日起發前去經由蝗蟲地頭更行督責取見殄滅次
第然後取道嵎縣山間望婺州界迤邐前去前路有合
奏聞事件續次申發所有上項事理須至先具奏聞者

右謹錄奏聞謹奏

簽黃

臣竊聞旱蝗之災過貽聖慮夙夜焦勞至忘寢味臣雖
疎賤不勝感泣震懼之至今此前去災傷州郡敢不究
心竭力周爰咨詢庶有以仰稱明詔之萬一但前奏乞
錢數事欲望睿旨早賜施行臣雖未到諸郡近日提刑
傅淇張詔自彼來歸其言所見委實災傷至重尙慮臣
所乞錢數少不足周給臣緣未經目見不敢再具懇請
且乞早賜指揮依臣前奏應副施行庶幾前路所到州
郡便可布宣德意措約收糴以慰飢民之望若不得此
實無措手之處將來坐視陛下赤子流離溝壑臣雖萬
死不足贖罪伏乞聖照

臣去年到任已是深冬狼狽急迫措置不辦只得將所
蒙給賜錢米計口分俵誠爲可惜今來雖是災傷然日

月尚寬足可措置臣已行下逐州通判檢計有合興脩水利去處將來廣募飢民給食工作唯是老弱殘疾婦女之類無依者方與賑給庶幾不至又似去年虛費官物伏乞聖照

乞脩德政以弭天變狀

具位臣朱熹

右臣昨爲本路旱傷祈禱不應累曾具奏及申尚書省乞爲敷奏早作防備近準省劄已蒙聖慈特從所請支錢於明州置場糴米而又伏覩陛下發自宸衷特遣中使降香祈禱臣有以見陛下畏天恤民之心至深至切不勝感激願效愚忠顧恨官有常守無由瞻望清光罄竭血誠庶裨萬一不勝犬馬螻蟻區區之情竊謂累年之旱謹告已深今日之災地分尤廣非惟官府民間儲

備已竭而大農之積亦已無餘又當大禮年分戶部催督州縣積年欠負官物其勢不容少緩凡所以爲施舍賑恤之恩者竊恐又必不能如去年之厚臣竊不勝大懼以爲此實安危治亂之機非尋常小小災傷之比也爲今之計獨有斷自聖心沛然發號深以側身悔過之誠解謝高穹又以責躬求言之意敷告下土然後君臣相戒痛自省改以承皇天仁愛之心庶幾精神感通轉禍爲福其次則唯有盡出內庫之錢以供大禮之費爲收糴之本而詔戶部無得催理舊欠詔諸路漕臣遵依條限檢放稅租詔宰臣沙汰被災路分州軍監司守臣之無狀者遴選賢能責以荒政庶幾猶足以下結民心消其乘時作亂之意如其不然臣恐所當憂者不止於餓殍而在於盜賊蒙其害者不止於官吏而上及於國

家也臣蒙恩至深不知死所敢冒鈇鉞爲陛下言之觸
犯天威恭俟夷滅謹錄奏聞伏候勅旨地分一作地里
再奏衢州官吏擅借支常平義倉米狀

具位臣朱熹

臣照對本路諸州今歲旱傷比之他郡衢州尤甚將來
細民必至艱食全籍本州所管常平義倉米斛賑濟賑
糴以救民命臣近點檢衢州沈密一違法擅行借兌過
常平義倉米八千石充四月五月官兵俸料臣已一面
行下衢州督催補還元舊窠名及具錄奏聞乞將本州
當職官略行責罰以戒後來未得回降今來再據衢州
沈密一申又於常平米內借支三千五百石充六月分
軍糧三箇月共擅借過一萬一千五百石并本州申先
借支過常平米一萬九千五百八十一石五斗六升四

合亦係充官兵俸料未曾撥還及稱目下盤量折欠米
一萬七千七百一十五石五斗一升三合三勺三項共
計四萬八千七百九十七石七升七合三勺更有衢州
濟糴未盡米一萬八千一百九十九石一斗九升本州
所申不曾聲說此項米着落必是亦有互用臣照對在
法義倉穀唯充賑給不得他用擅支用者以違制論況
本路諸州所管常平義倉米斛唯衢州萬數稍多輒皆
擅行支用目今見管止有三千一百六十五石三斗八
大升委是大失指準而本州略無忌憚甚非朝廷置立常
平之意竊慮必有情弊臣除已一面牒鄰近州追衢州
合千人收索赤曆干照逐一根勘從法施行外欲望聖
慈先將衢州違法擅支常平義倉米當職官吏特行責
罰以警諸郡爲擅用常平義倉米者之戒須至奏聞者

右謹錄奏聞伏候勅旨

奏採荒畫一事件狀

臣竊見本路諸郡頻年災傷蒙被聖恩僅獲全濟今又亢旱周遍七州其幸免者不過三五縣比之去年被災地分大段闊遠至於公私積蓄則連年饑歉支移發散略已無餘其於措置尤爲費力臣本欲此月上旬巡歷諸郡計度合用錢米詢訪合行事務回日類聚奏聞庶免煩天聽今爲紹興府會稽縣界蝗蟲害稼見行監督掩捕埋瘞已是累日未見衰減未敢起發前去竊慮合奏請事漸致後時有失及早措畫今略條具一二冒昧以聞伏望聖慈閱此一方重懼災數特垂矜恤早賜施行不勝幸甚

一臣昨曾具奏乞詔州縣照應省限理納夏稅不得促限追呼已蒙聖慈頒下施行今聞諸州間有不遵稟

者公行文移必要七月上旬取足顯屬違戾兼昨具
奏乞將紹興府去年住催夏稅人戶納過之數依做
秋苗所放分數特與比折今年合納之數亦蒙聖慈
行下又爲戶部巧爲沮難行下本府催督愈峻今來
既是復有災傷豈是追呼箠撻催督稅賦之時欲望
聖慈特降指揮令被災州郡將所管縣分被災重處
特與寬限勸諭送納其不係被災縣分內有被災鄉
分亦合較量輕重依此施行其紹興府理折夏稅亦
乞直降指揮依臣所乞施行庶幾遭難遺民稍獲安
業

一臣昨具奏諸州雨暘次第曾有貼黃奏稟乞詔州郡
依條受理旱帳及早差官檢放事蓋爲田稻既是乾
損及其未穫之際便行檢踏卽荒熟之狀明白易知

非惟官司不得病民亦使姦民無由僥倖所以著令
訴旱自有三限夏田四月秋田七月水田八月蓋欲
公私兩便近來官吏不曾考究令文但據傳聞云訴
旱至八月三十日斷限遂至九月方檢旱田則非惟
田中無稼之可觀至於根查亦不復可得而見矣於
是將旱損旱田一切不復檢踏蠲放窮民受苦無所
告訴而其狡猾有錢賂吏者則乘此暗昧以熟爲荒
瞞官作弊皆不可得而稽考去歲本路諸州大率皆
然欲乞降指揮劄下轉運司及本司遍牒諸州縣疾
速受理旱狀目下差官檢踏旱田荒熟分數其中晚
稻田卻候八月受狀節次檢踏如有奉行違慢後時
失實之處許兩司按劾以聞庶幾窮民將來獲霑實
惠目下聞此德音便知朝廷存恤之意不至猖狂別

生妄念仰勞宵旰之憂實爲利便

一賑恤之備去年諸郡公私猶有蓄積緣今春支用數多悉已無餘今被災之民旣是不可不加接濟則其費皆當出於朝廷臣本欲遍詢諸郡約見合用實數然後奏請今恐因循後時失於措置兼聞衢婺明州守臣皆欲丐祠而去台州亦申本司乞撥錢糴米數目甚多又見臣寮劄子論衢州等處見已乏食及有指揮行下閩廣勸諭客米前來温州接濟可見一路州軍荒歉匱乏事勢已急臣今且約一路之數權以一百萬貫爲率欲望聖慈特賜開許印給度牒官會早賜給降其度牒欲乞就十分錢數之內且給三分依近降指揮每道且賣五百貫文省或依元價作四百貫文省容臣約度分俵諸州守臣令其多方措置

變轉收糴庶幾趁此早穀成熟之際便於左近有米去處價直尙平之時節次收拾免致臨時倉卒貴價收糴緩不及事

一訪聞諸州府村落已有彊借劫奪之患此在官司固當禁約然亦須先示存恤之意然後禁其爲非庶幾人心懷德畏威易以彈戢若漫不加省待其生事然後誅鉏則所傷已多所費又廣況其不勝何患不生乞降指揮早撥上項錢數使如臣者得以奉承宣布遍行曉諭卽德意所孚固有以銷厭禍亂之萌矣然後明詔安撫提刑兩司察其敢有作過唱亂之人及早擒捕致之典憲庶幾姦民知畏不至生事

一去歲獻納糴濟之人近已各蒙聖恩補授官資無不感戴然去歲所降減半指揮止於紹興一府施行今

則一路皆荒事體不同乞降指揮檢會當來耿延年
所乞事理許於浙東一路通行

一檢準常平免役令諸興脩農田水利而募被災飢流
民充役者其工直糧食以常平錢穀給臣契勘本路
水利極有廢壞去處亦有全未興創去處欲俟將來
給到錢物卽令逐州計度合興修處顧募作役旣濟
大飢民又成永久之利實爲兩便

一伏見州縣之吏不爲不多而其間才能忠信可倚仗
者極不易得將來七州糴濟往來督察用人必廣乞
降指揮特許將得替待闕丁憂致仕及在法不應差
出之官權行差使候結局日如舊庶可集事

右謹錄奏聞謹奏

簽黃

臣所乞錢數雖多然以今日明州中色米價計之方糴
得二十四五萬石散之七州不爲甚多而盤運水腳糜
費又在其外伏乞聖照

臣所乞紹興府理折夏稅事理極爲分明然在中夏以
前未經再旱之時行之固若有過優者在今日再旱之
後人物煎熬朝不謀夕之際沛然行之以紓民力則恐
未爲甚過況今據大數通府所放秋苗不過六分三釐
以此計之所減夏稅亦不甚多若以去年比例言之今
年夏稅亦合住催況此是補還去年之數直行放免不
爲過當重念臣自論此事上爲省部所嫉下爲州郡所
仇藉躡形迹無所不至原其本心只爲陛下愛養疲民
護惜根本誠亦何罪而至於此切望聖明哀憐照察
臣竊詳在法檢視蠲閣隸轉運司臣今敢以爲請者蓋

緣蠲閣賑恤本是一事首尾相須若蠲放後時失實使
飢民已被輸納追呼之擾然後復加賑恤則與割肉啗
口無異故臣妄意欲得參與其事庶幾血脉貫通使聖
朝賑恤之恩不爲虛枉伏乞聖照

臣所奏請固皆今日所當施行而此項最爲急切竊恐
大臣進呈之際謾將一二項不甚緊要事節量行應副
卻將此項沉溺不爲施行俟臣再請則又費月日致失
機會且如明州糴米一事臣本是四月二十三日以後
節次申奏是時明州米舡輻湊正好收糴乃不施行及
至六月十一日方得指揮則所有舡米已爲上戶收糴
殆盡矣今朝廷施行事體緩慢姦弊百端不稱陛下救
焚拯溺之意大率類此臣不敢越職奏聞惟是此事切
乞斷自聖志力賜主張蓋不惟一路民命所繫實亦國

家休戚所關願陛下獨留聖慮

臣曾摹得蘇軾與林希書說熙寧中荒政之弊費多而無益以救之遲故也其言深切可爲後來之龜鑑近已刻石本司緣是臣下私書不敢容易繳進今有一本急於申奏不及如法標背已申納尙書省或蒙宣索一賜覽觀仍詔大臣常體此意不勝幸甚

此項以後係是次緊內推賞差官兩條亦乞早留聖意
乞留婺州通判趙善堅措置賑濟狀

具位臣朱 熹

臣據知婺州錢佃申備據國學進士唐季淵等狀本州去歲遭旱特甚通判朝奉郎趙善堅協力措置災傷廣求利害籍貧乏家七十萬口置濟糶場五百餘所勸諭上戶糶米借貸排日煮粥以食民之不給津遣鄰郡流

移收養小兒遺棄病者醫藥以療之無流移凍餒之人
存活者幾百萬口實迹可考今歲闔郡乾旱祈禱尙未
感通飢餓狼狽指日可待趙善堅前來賑濟有方況今
歲之旱甚於去歲善堅解罷在卽不惟邦民失所倚賴
而州郡亦大失裨助乞特敷奏權留在州同共措置賑
濟佃契勘去歲早歉通判趙善堅專一措置賑濟遍歷
諸邑山谷點檢糴場委是宣勞實惠及民今年梅雨愆
期旱歉至甚照得通判趙善堅今年七月十八日任滿
本州委是闕官措置乞移牒趙善堅權留在任同共措
置賑濟候來年細民接食卻行解罷臣照對婺州去歲
災傷本州通判趙善堅措置濟糴存恤飢民委有勞効
本官雖將任滿本州今歲又遭旱傷比之去年尤甚切
要知得措置首尾官員差委幹辦欲望聖慈特賜睿旨

許從本州守臣錢佃備到士民連狀所請令善堅在任同錢佃協力措置災傷庶免誤事須至奏聞者
右謹錄奏聞伏候勅旨

乞將合該蠲閣夏稅人戶前期輸納者理折今年
新稅狀

具位臣朱熹

臣昨備據紹興府士民魏必大等狀陳訴具狀申奏朝廷乞行下紹興府將災傷諸縣自第一等至第五等人戶照應淳熙八年已納夏稅和買役錢等依秋苗檢放分數除豁外有餘剩納過分數與理作今年合納夏稅事續承降五月三十日省劄戶部勘當卽不委本府去年受納到人戶錢物自第一等至第五等各等各戶納到若干分數比秋苗有無多納過錢絹紬綿數目獲奉

聖旨指揮劄下開具保明供申臣已恭稟施行及照得
取會各等逐戶數目緣諸縣戶名萬數浩瀚竊慮遲延
有妨催科繼已具申尙書省今一面取會到諸縣去年
總計管納夏稅官物除山園陸地浮財屋產外其湖藉
田共計合納二十八萬六千三十七屯匹三丈六尺七
寸五分折帛役錢等三十萬三千四百九十六貫七百
五十文除被水滄浸倚閣蠲免及人戶納到錢帛外有
未納共五萬三千五百七十六屯匹一丈五尺一寸六
分錢四萬一千四百六十一貫二百六十八文若以檢
放秋苗分數合計七萬一千三百七十八屯匹一丈七
尺八寸錢一十萬九千五百一十六貫二百八十二文
外諸縣止有剩納三萬七千八百九屯匹三丈九尺八
寸六分錢七萬七千二百三貫九百二十六文在官乞

理作今年合納之數臣照對紹興府諸縣所管湖藉田
畝出納夏秋二稅官物去年緣爲災傷其秋苗係隨田
內禾稻輕重檢放其所輸夏稅雖因水災得蒙蠲閣後
來繼卽遭旱水不及處亦無所收緣係未收成以前起
催所以人戶多不霑被減放之恩又八月內降到蠲閣
指揮之時人戶之善良畏事者皆已輸納其得被聖恩
者實皆頑猾之戶事體輕重甚不均一臣又竊覩去歲
災傷飢民猥衆尙蒙聖慈撥賜錢米救濟豈有田內夏
稅已蒙蠲閣人戶前期誤行輸納者卻不與理折今年
新稅甚非朝廷矜恤之意況今夏以來諸邑又多亢旱
斯民接連飢荒方苦艱食當此催科之時委實無可輸
納若不蒙朝廷特加優恤必見失所況以諸縣數百萬
戶口今來所乞通理剩納之數其爲物帛止三萬七千

八百九十七屯匹三丈九尺八寸六分錢止七萬七千二百三貫九百二十六文數目既少於朝廷所損不多而民戶可霑實惠欲望聖慈俯賜允從特降指揮將人戶去年剩納前項數目與理作今年之數蠲豁庶幾嗷嗷之民得以安業須至奏聞者

右謹錄奏聞伏候勅旨

奏巡歷沿路災傷事理狀

具位臣朱熹

今具沿路災傷事理下項須至奏聞者

一臣七月十六日再到田間看視蝗蟲大者絕少而小者尙多當處多是旱中禾稻皆已成熟多被喫損人戶皆稱檢官未到見分數不敢收割臣已牒本府催促所差下官日下出門前來檢視去訖又

支錢付曹娥監鹽官收買十四十五都蝗蟲并行
埋瘞續據上虞餘姚縣申到本縣蝗蟲頗多亦已
行下催促支錢收捕埋瘞今來頻得兩澤遠近沾
足竊意其蟲必當殄滅已牒本府一面審實具奏
伏乞聖照

一臣十七日經歷上虞縣界田皆遭旱彌望焦赤間
有近水去處尙有些小可望收成觀其災傷委是
至重而本縣不受人戶投訴反將投訴人戶刷具
舊欠監繫門頭及出招子催督稅賦無問貧富大
小人戶五日一限逐限輸官之外人吏定要乞錢
一百文省其不到者卽差公人下鄉追捉搔擾尤
甚乞覓尤多人戶不勝其苦一日之間遮臣泣訴
者至五七百狀臣已送本府存恤究治施行去訖

更乞聖慈特賜指揮庶幾州縣有所懲戒免致重困飢民不勝幸甚

一臣十八日到嵎縣其旱勢尤甚於上虞蓋紹興諸縣之旱嵎爲最而上虞次之餘姚又次之然上虞餘姚去年猶得薄收獨嵎縣一連三年遭此極重之災雖其上戶中家已覺艱窘鰥寡細民則已有掇稗子而食者臣曾支錢三十文買到所採稗子一升今申納尙書省欲乞宣索一賜觀覽早降指揮令紹興府將此三縣新舊稅租特與倚閣俟見秋苗合放分數斷自宸衷別賜處分不勝幸甚

一臣十九日至新昌縣是日午後連得大雨幾至通夕本縣先來亦苦乾旱早稻皆已失收中晚之田亦已龜坼方自中旬以來連日得雨田中遂皆有

水中晚之禾間有可望去處可勝上虞等縣但諸縣大抵旱乾日久得雨後時秋序已深氣候寒冷其間稻苗雖尙青活而不復能結實者亦多有之荒熟之形尤難分別臣已遍牒檢視官員切宜子細不可差誤伏乞聖照

一沿路人戶已損田段不堪收割皆欲及早耕犁布種蕎麥二麥之屬接續喫用但以檢放未定不敢施工欲望聖慈特降指揮催促檢放庶幾不妨民間及早耕種其有闕少種糧之人更令官司量行應副尤爲厚幸

一臣二十一日入台州天台縣界以後事理尋別具奏聞伏乞聖照

右謹錄奏聞伏候勅旨

奏知寧海縣王辟綱不職狀

具位臣朱熹

臣昨爲親見台州寧海縣人戶流移已曾具奏竊慮深軫聖懷自到本州卽行詢究見得本縣流移人戶已是千有餘口其知縣宣教郎王辟綱恬然不恤亦無申報委是不職竊恐將來糴濟事務繁夥必是不能了辦欲望聖慈特賜罷黜或依已得指揮與監廟一次仍特不理作自陳須至奏聞者

右謹錄奏聞伏候勅旨

奏揀荒事宜畫一狀

貼黃

奏爲本路災傷已蒙聖慈支降錢三十萬貫更乞接作二百萬貫及別有畫一奏聞等事伏候勅旨

具位臣朱熹

臣昨以本路荐被災傷輒以賑卹事宜一二條奏伏蒙聖慈曲賜俞允仍賜錢三十萬貫以充七郡糶濟之用德意甚厚臣謹已奉宣詔旨頒布遠近飢饉餘民感激受賜歡聲如雷此固足以見陛下天地父母生成覆育之恩矣然臣愚暗不知分量輒敢更有無厭之請觸冒萬死復以奏聞伏惟陛下少留聖聽臣不勝幸甚今具下項

一臣昨奏請給降錢一百萬貫爲一路救荒之備已蒙聖慈開允應副三十萬貫不勝幸甚然臣自昨者具奏之後續據諸州申到所乞錢數明州一百萬貫婺州六十萬貫處州十萬貫台州十萬貫而紹興府衢温州尙未申到計其所須當亦不下三

二十萬大抵通以一路計之約二百餘萬貫始可
足用而臣向來所請不及其半致陛下未知合用
實數其所予者又不及所請之半臣之罪大無所
逃刑唯有及今據實披露尙冀可補萬一臣竊計
本路四十一縣除得熟縣分不過十數其餘大抵
皆荒且以三十縣計之若得二百萬貫則一路可
得米五十萬石而一縣當得一萬六千餘石若止
得一百萬貫則一縣但可得米八千餘石今乃僅
得三十萬貫則是一路得米不過七萬餘石而一
縣爲二千餘石而已其逐縣合糶給戶口雖已立
式行下取會未到然以去年紹興諸邑之費推之
則一縣用米有至四五萬石者況今歲之荒甚於
去歲一縣飢民之衆其非八千二千石之所能濟

亦不待算計而可知矣今欲少俟取見戶數而後計所不足續有陳請則恐地分闊遠取會未能遽集之間而已後糴米之期矣冬春之間糴者日衆米價日高臣恐用錢愈多得米愈少而民之飢者愈失望也臣愚欲望聖慈深察前項事理特降睿旨更撥錢一百七十萬接前所給通作二百萬貫令臣及早分給諸州廣行運糴俟見糴給戶口實數卻行計度支用不盡之數先次拘收回納亦未爲晚伏候聖旨

簽黃

竊恐度牒官會發出太多難以發洩今減半賞格已蒙施行欲乞指揮紐計米數量給空名告身五七十道并度牒官會接成二百萬貫付臣收掌則

富民聞之願獻助者必多如有應格之人卽乞許令提舉官與安撫使照應見行減半賞格聚廳書填當面給付亦足以關防私曲情弊伏乞聖照

一臣昨奏乞依耿延年所奏浙東一路獻助米斛人戶並與減半推賞已蒙聖慈開允施行不勝幸甚但指揮內卻有將來檢踏見得災傷最重處方得保明取旨之文則臣恐聽者不能無疑而未有應募之意也臣雖已行下州縣令人戶願獻助者先經本司自陳特與標撥赴災傷最重州縣送納支散然人戶未知省部人吏將來的將是何州縣作災傷最重去處則終不能無疑且天下一家初無彼此而本路災傷重處殆計八九但令在在處處米穀堆積而徐視飢民闕食尤甚去處般運以往

則亦無處不可入納又何必逆爲此不可取旨之
端以疑羣聽而誤飢民之命哉臣愚欲望聖慈深
察上件事理特降睿旨一依乾道七年耿延年所
請已得指揮施行而刪去今來所增委曲關防之
語使大哉之言一哉之心有以宣著暴白於天下
則有餘粟者爭先應募而所賜之錢又可會計餘
數拘收回納是亦所謂惠而不費者伏候聖旨

一 臣昨具奏乞詔州縣寬限催稅已蒙聖慈特詔本
路州縣將合納稅賦並照省限催促不得非理搔
擾不勝幸甚但今年旱傷實非去年之比若據事
理所有夏稅自合依去年例特與住催竊緣節次
蠲放蒙恩已多不敢便爲陳乞但今八月十五日
省限已滿州縣自此必是公肆追呼無所忌憚使

被災餘民無所告訴馴致死徙仰貽宵旰之憂臣
愚欲望聖慈深察上件事理特詔有司將本路被
災縣分人戶夏稅權行住催卻俟檢放秋苗分數
定日卻將夏稅亦依分數蠲減一併催理庶幾飢
民均被實惠伏候聖旨

簽黃

臣契勘紹興府今年人戶丁錢已蒙聖慈盡數蠲
放今者本路諸州例遭災旱而台州丁錢最重下
戶尤以爲苦欲望聖慈許將台州五縣第五等人
戶今年丁絹特與蠲放庶幾千里飢民得免追呼
決撻之擾不勝幸甚伏取聖旨

一臣昨所奏逐項事理並蒙開允獨有依準舊制募
飢民修水利一事未蒙施行臣竊見連年災旱國

家不忍坐視夫民之死大發倉廩以拯拯之其費以巨億計蓋其賑給者固不復收其賑糶者雖曰得錢而所折閱亦不勝計仁聖之心於此固無所吝然飢民百萬安坐飽食而於公私無毫髮之補則議者亦深惜之故臣嘗竊仰稽令甲私計以爲若微於數外有所增加以爲募民興役之資則救災興利一舉而兩得之其與見行糶給之法利害之算相去甚遠故不自揆旣以奏聞而輒下諸州委自通判詢究水利合興復處以俟報可至於近日巡歷又得親見所至原野極目蕭條唯是有陂塘處則其苗之蔚茂秀實無以異於豐歲於是竊歎益知水利之不可不修自謂若得奉承明詔悉力經營令逐村逐保各有陂塘之利如此則民間

永無流離餓莩之患而國家亦永無蠲減糴濟之費矣不謂言語疎略未蒙鑒照敢竭其愚重以爲請伏望聖慈深察上件事理許臣前項所請百七十萬貫者而令於內量撥什三候諸州通判申到合興脩水利去處卽與審實應副其合糴給人應募者卽令繳納糴給由曆就顧入役俟畢工日糴給如舊則所損不至甚多而可以成永久之利絕凶年之憂費短利長未爲失策伏候聖旨

簽黃

臣又竊恐興脩水利所費太多難以支給卽乞且令貸與食利人戶顧工興役卻候將來豐熟年分紐計米數量分料次赴官送納椿管在官尤爲利便伏候聖旨

一臣昨嘗面奏乞令被災州縣人戶苗米五斗以下不候檢踏先次蠲放以絕下戶細民奔走供億計囑陪費之擾誤蒙聖慈曲賜開納今者本路復遭旱虐竊欲取旨依此施行但今檢官已在田野如蒙開允卽乞聖慈特降指揮令轉運司疾速施行若俟命下到臣巡歷去處然後施行卻恐緩不及事伏候聖旨

一臣伏覩歲既不登所在艱食全賴商賈阜通之利所宜存恤不可搔擾今米穀不得收稅雖有成法而州縣場務多不遵守至於往糶而有所挾之資既糶而有所貿之貨則往來之間經由去處尤以邀阻抽稅爲苦是致客人憚於興販欲望聖慈特降睿旨申嚴舊法仍詔有司諸被災州縣人戶欲

興販物貨往外州府收糴米穀就闕米處出糴者
各經所在或縣或州或監司自陳所帶貨物判執
前去其糴米訖所買回貨亦各經所在自陳判執
回歸往回所過並不得輒收分文稅錢違者並依
稅米穀法必行無赦如蒙開允卽乞徑下轉運司
約束沿江瀕海所過場務遵稟施行庶幾商販流
通民食不匱伏候聖旨

右謹錄奏聞伏乞勅旨

奏明州乞給降官會及本司乞再給官會度牒狀
具位臣朱 熹

臣據明州申契勘本州今歲闕雨管下六縣皆有旱傷
去處竊慮細民闕食本州雖有常平錢米所管不多今
來事勢不可少緩本州遂於七月十八日具奏乞支降

官會一百萬貫下本州循環充本雇備人舡出海往潮
廣豐熟州軍收糴米斛準備賑糴賑濟或朝廷不欲支
動經常之費卽乞支降空名度牒一千道官告三十道
具下本州轉變糴米未蒙回降申本司乞更賜敷奏臣照
對本路諸州今歲皆有旱傷比去年大段不同雖荷聖
恩給降官會度牒共三十萬不足支遣臣已具奏乞再
給一百七十萬貫接前作二百萬貫如蒙朝廷應副便
可均給諸州今又據明州所申合行備錄奏聞伏望聖
慈照臣前奏事理早賜依數給降仍乞就撥紹興府先
蒙降到度牒一百道所換米二萬石及明州先蒙降到
二十萬貫糴到米並付本司均撥應副紹興府明州糴
濟及貸與食利人戶興修水利卻於二百萬貫內除豁
其水利貸錢向後豐年卻令逐旋回納實爲利便須至

奏聞者

右謹錄奏聞伏候勅旨

晦庵先生朱文公文集卷第十七

福州府學訓導舒整校

晦庵先生朱文公文集卷第十八

奏狀

奏台州免納丁絹狀

具位臣朱熹

臣巡歷至台州據屬縣人戶陳狀稱逐年身丁每丁合納本色絹三尺五寸并錢七十一文被州縣登承抑納絹七尺其實本州每丁只發納上供三尺五寸却將錢七十一文令人戶倍輸折納本色竊念本州縣人戶連遭荒旱細民艱食見蒙追催緊急無所從出乞將遞年多納理作今年合納其今年倍納在官乞理爲來年合納之數臣喚到台州典級楊松年陸迅等供施照案例臨海五縣人戶合納丁絹除第一等止第四等係將丁產稅錢併紐科納絹帛外所有第五等丁絹檢準建炎

三年十一月三日德音節文兩浙人戶歲出丁鹽錢每
丁納錢二百二十七文並令納絹一丈綿一兩已是太
重自今第五等以下人戶一半依舊折納外餘一半折
納見錢台州人戶身丁每丁供鹽稅錢一百四十一文
足折納絹七尺自紹興三年首正將第五等人戶丁鹽
錢除一半折納絹三尺五寸外有一半折納見錢七十
文足五分計減退本色絹數是致闕少絹帛支遣本州
於紹興四年相度貼支官錢湊納具申朝廷獲奉聖旨
令台州揶管見錢與人戶納到數目依市價賣發不得
科數搔擾本州自紹興四年以後却將第五等人戶合
納一半丁錢七十文五分足紐納絹三尺五寸照得第
五等人戶計一十九萬九千八十四丁合納丁鹽錢二
萬八千七百貫八百四十四文除一半納本色外有一

半止合納丁錢一萬四千三十五貫四百二十二文足
本州却將上件丁錢紐作本色絹三尺五寸催納計絹
一萬六千五百九十匹一丈二尺以致人戶陳理今來
若放免一半丁絹却合納催一半丁錢一萬四千三十
五貫四百二十二文足其所免上件丁絹本州逐年自
有支用趲剩紬絹一萬六千二百餘匹可以通那充官
兵等支遣不礙起發上供綱運之數臣照對台州諸縣
連年災傷細民重困若不優加存恤必見流移其第五
等人戶所納丁稅既有元降建炎三年指揮許納一半
見錢自不應並納本色今來台州若免納一半丁絹本
州自有趲剩紬絹可以通那支遣不礙起發上供之數
委無相妨臣已行下台州及臨海等縣遵照建炎三年
獲降聖旨令人戶逐年每丁送納絹三尺五寸并一半

見錢七十文五分足免致重困貧民下戶不得仍前違戾科抑外須至奏聞者

右謹錄奏聞謹狀

再乞給降錢物及減放住催水利等狀

具位臣朱熹

臣於今月初一日及六日兩次具奏乞給降錢物應副本路諸州糶濟支用等事至今半月未奉進止竊緣自今已向深秋欲得上項錢物給付逐州及早運糶其餘事件亦合早作措置庶幾將來飢民得沾實惠不至復似去年措置後時追悔無及但緣臣近日不合按劾知台州唐仲友不公不法事件違忤貴臣不敢更以私書手劄陳懇廟堂催促敷奏竊慮進呈淹緩有誤一道飢民性命之計今不免再具畫一事目奏聞欲望聖慈鑒

茲愚悃發自宸衷斟酌事宜特降處分先將愚臣重賜行遣別選膚使錫以緡錢使布寬大之恩其減放住催水利募糴等事亦係本路救荒緊要節目若俟新官奏請然後施行必是遲緩誤事欲乞權依臣奏且與施行不勝幸甚須至奏聞者

一奏乞特降睿旨支撥錢一百七十萬貫接前所給通作二百萬貫令臣及早分給諸州廣行運糴俟見糴給戶口實數却行計度支用不盡之數先次拘收回納仍乞於內紐計米數量給空名告身五七十道并度牒官會接成二百萬貫付臣收掌如有獻助及格之人令臣與安撫使書填給付

一奏乞特降睿旨於今來所降減半指揮內刪去將來檢踏見得災傷最重處方得保明取旨之文只

依乾道七年耿延年所請已得指揮施行

一奏乞特降睿旨將本路災傷縣分人戶夏稅權行住催少俟檢放秋米分數定日却將夏稅亦依分數蠲減

一奏乞特降睿旨許臣前項所請百七十萬貫却於數內量撥什三候諸州通判申到合興修水利去處卽與審實應副其合糴給人有應募者卽今繳納糴給由曆就顧入役俟畢工日糴給如舊

一奏乞特降睿旨許令被災州縣人戶苗米五斗以下不候檢踏先次蠲放令轉運司疾速施行

一奏乞特降睿旨申嚴米穀不得收稅舊法仍詔有司諸被災州縣人戶欲興販物貨往外州府收糴米穀就闕米處出糴者各經所在或縣或州或監

司自陳所帶貨物判執前去其糶米訖所買回貨亦各從所在自陳判執回歸往回所過並不得輒收分文稅錢違者並依稅米穀法必行無赦徑下轉運司約束施行

一奏乞特降睿旨就撥紹興府先給到度牒一百道換到米及明州先蒙降到二十萬貫糶到米並付本司均撥應副紹興府明州糶濟及貸與食利人戶興修水利却於二百萬貫內除豁其水利貸錢向後豐年却令逐旋回納

右謹錄奏聞伏候勅旨

乞降旨令婺州撥還所借常平米狀

具位臣朱熹

臣伏準尙書省劄子備據知婺州錢佃奏乞於本州見

管常平義倉米內支借二萬石支遣軍糧八月三日三省同奉聖旨許支借二萬石限至歲終撥還臣除已恭稟施行外臣竊見義倉米在法唯充賑給不許他用今歲婺州諸縣例皆旱傷將來細民必致闕食本司尙自申奏朝廷支降官會度牒應副本州糴米而義倉窠名正係賑給之數先來本州已曾借過一萬七千石元降指揮候秋成先次撥還尙未還到顆粒今來再借二萬斛止存七千餘石已是不足支遣而所借之米又蒙許令歲終撥還深恐後時有誤糴濟欲望聖慈特降指揮令婺州將兩次借過米三萬七千石趁此秋成盡數先行撥還庶幾可以添助糴濟須至奏聞者

右謹錄奏聞伏候勅旨

奏巡歷至台州奉行事狀

具位臣朱 熹

臣照得本路州縣今歲旱傷臣自七月十五日出巡取道嵯縣迤邐入台州按視及預行措置賑恤事件節次具奏外臣已於八月十八日起離台州取處州前去所有台州奉行事件須至奏聞者

一臣七月二十三日到台州二十五日準尙書省劄子恭奉聖旨給降度牒三百道官會一十五萬緡臣卽時分撥應副諸州外仍於台州刷到常平司及諸州庫眼有管窠名錢八萬貫及於降到錢會內撥錢二萬貫共湊一十萬貫量逐縣災傷輕重地里闊狹均撥應副仍詢訪到土居官員士人誠實練事爲衆所服者一縣數人以禮敦請令與州縣當職官公共措置差募人舡前往得熟去處收

糴米斛循環賑糶仍多方敦請上戶說諭或出米
穀或出錢物并行運糶添助賑糶仍據本州申到
見管常平義倉米五萬二千餘石已令揜管準備
賑濟及一面立式選差都正鄉官等家至戶到從
實抄劄法應糶濟大小戶口取見的確數目各隨
比近置場以俟將來闕食就行糶濟仍立罪賞約
束不得泛濫抄劄枉費官廩外伏乞聖照

一 臣所經歷去處得雨之後晚稻之未全損者並皆
長茂可望收成但民間所種不多僅當早稻十之
一二其早稻未全損者亦皆抽莖結實土人謂之
二稻或謂之傳稻或謂之孕稻其名不一目今有
已黃熟處亦有尙帶青色處村民得此接濟所益
非細但其稻莖稀疎秕多穀少其色青者已逼霜

露恐難指擬至於粟苴油麻蕎麥之類却並有收次第今冬未至乏絕只爲荐飢民無蓋藏竊恐來春必至艱食臣已面諭州縣官吏常切體訪不拘早晚但覺民間闕食便行賑糶收錢運糶循環接濟無損於官有益於民實爲利便伏乞聖照

一 臣體訪到本州黃巖縣界分闊遠近來出穀最多一州四縣皆所仰給其餘波尙能陸運以濟新昌嵎縣之闕然其田皆係邊山瀕海舊有河涇堰閘以時啓閉方得灌溉收成無所損失近年以來多有廢壞去處雖累曾開淘修築又緣所費浩瀚不能周徧臣竊惟水利修則黃巖可無水旱之災黃巖熟則台州可無飢饉之苦其爲利害委的非輕遂於降到錢內支一萬貫付本縣及土居官宣教

郎林鼎承節郎蔡鎬公共措置給貸食利人戶相
度急切要害去處先次興工俟向後豐熟年分却
行拘納其林鼎曾任明州定海縣丞敦篤曉練爲
衆所稱蔡鎬曾任武學諭沈審果決可以集事但
本縣知縣范直興不甚曉事恐難倚仗欲乞依本
司已獲降到指揮特與嶽廟理作自陳別選清強
官權攝縣事庶幾興役救荒不至闕誤伏候勅旨
臣前項所奏給降到錢三十萬貫臣已分撥婺州
八萬貫衢州六萬貫處州五萬貫台州二萬貫黃
巖興修水利一萬貫及明州定海縣亦乞興修水
利已撥一萬貫共已撥二十三萬貫外尙剩七萬
貫初欲分撥應副明州紹興府而明州申到已奏
乞撥錢一百萬貫臣遂不敢拈出兼婺衢兩州連

年荒歉並無蓄積可以那兌運糴竊恐將來更有
欠闕欲且留此錢數更俟聖慈添撥到錢卽并諸
州再行均給所有添撥之數已兩次具奏今更於
後項開說伏乞聖照

一臣於八月初三日及十二日兩次具奏更乞聖慈
添撥錢物及紹興府明州元降度牒官會所糴米
斛通揍作二百萬貫文乞不候檢踏先放五斗以
下苗米又乞權住催夏稅零欠俟檢放秋苗分數
定日并行除豁理納又乞申嚴米穀免稅舊法仍
乞特降指揮與免往回物貨及搭帶稅物亦已日
久未奉進止欲乞聖慈詳臣兩狀早賜指揮伏候
勅旨

右謹錄奏聞伏候勅旨

簽黃

臣第二狀內已有陳乞別選膚使付以緡錢一節今更自度決難自効并望聖慈早賜處分

奏均減紹興府和買狀同本府

臣聞欲救巨患者不可惜小費欲除實弊者不可循虛名臣等叨蒙聖恩備數東浙竊見紹興和買之患民所不堪巧詐之徒姦弊百出前此議者非不欲救而除之而往往過爲國家顧惜小費下比流俗苟循虛名是以因循終莫能革臣等不肖誠不足仰窺聖德之萬分然有以知陛下愛民之心燭理之明於此必有所不屑者是以敢昧萬死而一言之伏惟陛下留神財擇臣等契勘浙東七州除温州無和買外其餘六州共管和買二十八萬一千六百四十四匹二丈一尺紹興一州獨當一十四萬六千九百三十

八匹乃占諸州一半以上緣此重困人不能堪所以子戶
詭名巧爲姦弊雖有重法終不能禁且如會稽一縣經界
之初舊例雖是物力三十八貫五百以上起科和買然以
通數計之實及四十七貫方滿一疋今亦自三十八貫五
百起科以通數計之乃自十八貫六百單一文已科一疋
則是向來科納一疋者今增爲二匹半矣官之所入不加
贏田之在民不加損止緣人苦其重避免者多以故姦僞
日滋以至此極向來官吏之有意於民者莫不知有此弊
亦未嘗不爲之惻然動心評議措畫亦旣多端而利害相
形終無定說如欲首併詭戶則懼其告訐成風徒敗風俗
而暫併復分終不能禁欲以畝頭均紐則縱舍游末重困
農民輕重之間亦未爲允欲科有產無丁之戶則彼能立
詭戶者固不憚更立虛丁而寡妻弱子實無丁籍者反受

其弊如欲減退物力等則或作鼠尾推排則彼昔者既能
析而爲三十八貫五百以下之戶矣今豈不能再析而爲
若干錢以下之戶乎故嘗參酌前後衆人之論而折衷之
獨有通計家活浮財物力貫頭均紐之說稍爲無弊雖第
五等戶昔無今有者未免有言然於其閒真僞亦復相半
若真貧民輸一戶之和買不過丈尺彼自不較惟是子戶
詭名之衆頓輸數戶積計甚多故尤不以爲便而必爭之
其力又足以挾下戶唱浮論以搖衆聽故不察其實者遂
以自疑而莫能復措其說此和買之議所以汹汹累年而
和買之害固未嘗有一毫之損也然竊嘗深究其受病之
原則無他焉直以元額之太重而已故今臣等相與熟議
輒陳此說欲望聖慈先發德音痛減歲額然後用貫頭均
敷之說以定其制惟慮所敷第五等戶之中真下戶者或

受其弊則請參用高下等第均數及減免下戶丁錢之說以優恤之但使真下戶者審知此法之行不爲厲己而無他辭則彼姦民之浮論亦可以置而不問矣謹畫一條具于后

一所以先裁減歲額者臣聞祖宗初立和預買法先支見錢後納紬絹民間實賴其利至有形於歌謠者而當是時本路漕臣有私於越州者其吏復私於會稽故此郡縣所拋獨多其後請本之數遂爲歲額而錢不復支絹日益貴以至今日而白着之科遂反爲一州無窮之害故建炎元年五月一日光堯壽聖憲天體道性仁誠德經武緯文太上皇帝登極赦書有曰和預買法本支實價訪聞官司立價甚低或高擡他物價直準折或以無實虛券充數甚者直至受納未

支本錢不遵條限前期起催急於星火今來上供之類欲依祖宗法其和預買有前項違戾守令并轉運司並以違制論加二等仍委提刑司覺察每歲於依限後一月內具有無違戾奏聞不以實聞與同罪仰味大哉之言則是太上皇帝再造之初聖慮之深固已及於此矣而兩聖相承於今五十餘年迫以軍國之須所資至廣卒未能有以仰稱睿謨預支實價以復祖宗之舊者臣等竊思其次獨有擇其甚處如紹興府者有以少解其倒垂之急爲庶幾焉爾然今欲去紹興和買之害使無姦弊稍得均平而不先減其當日請本之額譬如負千鈞者背膂之力旣已不堪乃不知減其所負之物但欲移而寘之懷袖亦必無益於事矣故今臣等於此首陳減額之說而議者顧

以爲有虧經費無所從補徒然奏陳必不聽許則臣等雖愚有以知其必不然也臣等仰觀陛下愛育黎元如親父母有以病告如切其身如頃年四川之虛額饒州之金徽州之絹汀州之銀青陽星子之稅放免蠲除不可勝計而連年水旱施舍貸給何啻數十巨萬何獨於此知其爲害之甚而不出指數萬匹者以紓之乎又况近日已蒙聖恩減免天慶攢陵等處和買二千餘匹固已漸示救患除弊之端矣然通而計之人戶所減每匹纔及一尺有奇而坊本煎鹽坍江放生四色所放尙未除免則臣等所以望於陛下者不但如此而已也臣等竊見浙西和買最重去處無如臨安府者而其數纔及八萬餘匹欲望聖慈將紹興府且依此例爲額而蠲其餘數至於版曹經費

或有所闕則乞量撥內帑之蓄以補其數蓋如本路坊場課利出剩錢數歲輸內帑者至若干萬貫皆是近歲曹泳創置窠名卽非舊法所當供者如此之類倘捐一二歸之版曹還以補填本路上供蠲減之數則聖澤下流人知德意舊弊庶乎其可革矣

一 所以謂貫頭均紐之說爲無弊者蓋今和買之重人悉規避詭爲下戶長姦滋弊莫可關防如經界之初會稽一縣凡爲物力錢一百二十六萬餘貫而四等以上科納和買者當一百一十萬餘貫今來四十年所謂四等以上止有物力錢三十七萬九千四百六十貫六百文而轉入五等者乃至七十二萬五百餘貫皆緣和買之重姦猾之民爭爲子戶詭名以避均敷而其淳謹畏法不敢爲者顧乃爲之代受所免之

數幾再倍於其舊政之不平莫甚於此從來爲用縣者灼知其弊非不嚴詭戶之禁往往隨併隨分終莫能革今若蒙恩先次痛減歲額却以貫頭均敷自物力一文以上並紐寸尺則高下多寡其數一定而姦弊無所從出矣若猶以真實下戶創科爲慮則所謂高下等第科敷以及減免下戶身丁之說臣等請得而備陳之

一所謂高下等第均敷者上戶舊科和買數多今用貫頭均敷則其數却須少減下戶舊不曾科和買今用貫頭均敷則其數乃是頓增若使頓增數中皆是子戶詭名則固不足恤第其間却有真實下戶不能無咨怨者故今復爲此法以優恤之如第一等物力四十貫當科和買一匹則第二等四十五貫乃科一匹

等而下之至於五等則戶愈卑而科愈少矣如此施行庶幾下戶所增不多不至反有重困

一所謂減免下戶丁錢者大率第五等中有丁者多是真實下戶無丁者多是子戶詭名今若將第五等戶所納丁錢特與除放則真實下戶雖增和買而得除此色官物其乘除之間亦略足以相補矣

右謹件如前欲望聖慈特賜省覽直降睿旨悉與施行則不惟臣等之幸實紹興闔境百萬生靈數十百年永永無窮之幸

貼黃

第五等戶計若干丁每丁一歲納錢若干統府八縣計

若干貫後闕

又小貼子

所以欲改畝頭二字爲物力貫百者蓋以畝頭科紐則獨有田之家被科而有浮財物力者不與亦有未均之弊故欲改作物力貫百則有田及浮財者皆在其中此奏是衆人商量而新秀州嘉興主簿諸葛千能操筆爲之其人有學行審細詳練恐可招而問之必能博盡異同得其利病之實伏乞台照熹上覆

奏鹽酒課及差役利害狀

臣竊見本司所管鹽酒課利國計所資爲甚廣而民情所患爲甚深若不根索弊原別行措畫竊恐民力日困亦非國家久遠之利臣雖書生不曉錢穀然其大體亦竊講聞久欲條奏以聞顧以救荒方急有所不暇今以罪疾力請投閑惓惓之私懷不能已輒有己見冒昧奏陳如有可採欲乞別選忠厚通敏之臣付以其事令其詳細稽考因事

制宜使民情亟得去其所患而國計永不失其所資實爲利便至於差役一事亦屬本司所管今亦有少利害并具其說如後須至奏聞者

一浙東所管七州而四州瀕海既是產鹽地分而民間食鹽必資客鈔州縣又有空額比較增虧此不便之大者夫產鹽地分距亭場去處近或跬步之間遠亦不踰百里故其私鹽常賤而官鹽常貴利之所在雖有重法不能禁止故販私鹽者百十成郡或用大舡般載巡尉既不能訶州郡亦不能詰反與通同資以自利或乞覓財物或私收稅錢如前日所奏台州一歲所收二萬餘貫是也以此之故除明越兩州稍通客販粗有課利外台温兩州全然不成次第民間公私食私鹽客人不復請鈔至有一場一監累月之間不

收一袋不支一袋而官吏糜費吏卒搔擾有不可勝
言者然以有比較之法州縣恐有殿罰則不免創立
鹽鋪抑勒民戶妄作名色抑令就買出入暗昧不可
稽考大略瘠民以肥吏困農民以資游手爲州縣爲
提舉主管者非不之知然皆以國計所資不敢輒有
陳說日深月久民愈無聊若不變通恐成大患臣生
長福建竊見本路下四州軍舊行產鹽之法令民隨
二稅納產鹽錢而請鹽於官近歲官鹽雖不支給而
民間日食私鹽官司旣得產鹽稅錢亦不復問其私
販雖非正法然實兩便欲乞聖慈特詔本司取會福
建路轉運司下四州軍見行產鹽法將本路地里遠
近鹽價高低比附參考立爲沿海四州鹽法其餘州
軍自依舊法施行則亦革弊救民之一事也伏乞聖

慈詳酌施行

一酒坊之弊其說有四一曰官監二曰買撲三曰拍戶
抱額四曰萬戶抱額臣竊以爲莫不便於官監莫便
於萬戶其他則亦互有利害而萬戶之中亦不能無
少利害要在講究詳盡然後施行則庶乎其弊之可
革矣今官監之害朝廷既知而罷之矣然州郡占吝
多不遵稟戶部漕司所撲仍不廢罷此則害雖除而
未盡者也買撲之害在買人有消折本柄破壞家產
之患在衆人有捭托抑勒捕捉欺凌之擾雖加禁防
法式明備然勢之所在終不能革拍戶抱額則庶幾
矣然或額重而抱納不前或藉此而捭托搔擾則其
弊亦不異於買撲唯萬戶抱額最爲簡便然須以一
州或一縣通計田畝浮財物力而均出之使無官戶

民戶之殊城居村居之異一槩均敷立爲定籍乃爲盡善若舍官戶而敷民戶舍城居而困村居不立官簿而私置草簿使吏得以陰肆出沒走弄於其間則又病矣此法本路處州見已施行四五十年民無爭訟官省禁防雖其小害尙不能無然入其封境觀其氣象宛然樂國與諸州不同今欲便取其法行於諸州則恐本州課額素輕或非他州之比未可遽議然他州課額雖多從來拘催少曾登足皆是虛名徒掛空簿若蒙聖恩深詔有司取淳熙六年七年八年三歲實催到庫之數參校取中立爲定額然後以此科數俾爲萬戶則亦庶幾安民省事之一端也伏乞聖慈詳酌施行

一臣於今年 月內曾具差役利害 事申尙書省幾

數千言內有徐詡所畫歇役年限一條最爲詳密而近準戶部行下乃無一言見施行者臣生長田間頗諳鄙事竊謂其言若得聖明一賜觀覽決須有可采者欲望聖慈特賜宣索觀其大槩然後付之愛民曉事老成詳細之臣令其看詳擇可行者具爲條畫別降指揮施行庶於陛下愛民之意少有裨補臣不勝萬幸

右謹錄奏聞伏候勅旨

奏義役利害狀

具位臣朱熹

臣巡歷到處州竊見本州昨奉聖旨依布衣楊權所請結立義役此見陛下愛民之切雖草茅之言苟有便於民者無不采納施行天下幸甚然本州目今奉行却有

未盡善者如令上戶官戶寺觀出田以充義田此誠善矣而本州却令下戶只有田一二畝者亦皆出田或令出錢買田入官而上戶田多之人或却計會減縮所出殊少其下戶今既被科出田將來却不充役無緣復收此田之租乃是困貧民以資上戶此一未盡善也如逐都各立役首管收田租排定役次此其出納先後之間亦未免却有不公之弊將來難施刑罰轉添詞訴此二未盡善也又如逐都所排役次今日已是多有不公而况三五年後貧者或富富者或貧臨事不免却致爭訟此三未盡善也所排役次以上戶輪充都副保正中下戶輪充夏秋戶長上戶安逸而下戶陪費此四未盡善也凡此四事是其大槩目下詞訴紛然何況其間更有隱微曲折未可倅見若不兼採衆論熟加考究竊恐將

來弊病百出詞訴愈多改之則枉費前功不改則反貽後患將使義役之名重爲異議者所笑無復可行之日誠有未便臣昨見紹興府山陰縣見行義役只是本縣勸諭人戶各出義田均給保正戶長各有畝數具載砧基其保正戶長依舊只從本縣定差更不別置役首亦不先排役次而其當役之戶既有義田可收自然樂於充應不至甚相糾訐但其割田未廣去處未免尙仍舊弊若更葺理增置便無此患竊謂其法雖似闊疎然却簡直易明無他弊病又且不須衝改見行條法委實利便故嘗取其印本砧基行下州縣然以未經奏請畫降指揮州縣往往未肯奉行臣愚欲望聖慈詳酌行下處州止令合當應役人戶及官戶寺觀均出義田罷去役首免排役次止用山陰縣法官差保正副長輪收義田

仍令上戶兼充戶長俟處州行之有緒却令諸州體倣
施行庶幾一變義風永息爭競須至奏聞者

右謹錄奏聞伏候勅旨

按知台州唐仲友第一狀

外封

奏爲本路諸州人戶間有流移去處奏聞事

內封

奏爲台州催稅緊急戶口流移知台州唐仲友別有不
公不法事件臣一面前去審究虛實奏聞事

貼黃

臣竊見本人近蒙進擢而臣蹤跡方此孤危較權量力
實犯不韙顧以疎賤蒙被誤恩實當一路耳目之寄不
敢緘默以負使令伏惟眷照力賜主張免致復爲小人

陰有中害不勝幸甚

具位臣朱熹

臣今月十六日起離紹興府白塔院道間遇見台州流民兩輩通計四十七人扶老攜幼狼狽道途臣問其故皆云本州旱傷至重官司催稅緊急不免拋離鄉里去逐食臣卽量給錢物喻令復業竟不能回各已迤邐西去臣因詢究得本州日前似此流移戶口已多目今方是初秋已致如此竊恐向後愈見數多除已行下本州約束令其存撫見在人戶毋致復有流移外臣續訪聞知台州唐仲友催督稅租委是刻急多差官吏在縣追呼屬邑奉承轉相促迫急於星火民不聊生又聞本官在任多有不公不法事件衆口謹譁殊駭聞聽臣今一面躬親前去審究虛實別具聞奏乞賜究治外所有

上項事理須至先次奏聞者
右謹錄奏聞伏候勅旨

按唐仲友第二狀

貼黃

奏爲知台州唐仲友違法促限催稅搔擾飢民事伏候
勅旨

具位臣朱熹

臣昨訪聞知台州唐仲友催稅急迫致得民戶流移等
事卽具大略奏聞今巡歷到本州天台縣據人戶遮道
陳訴本縣夏稅絹一萬二千餘匹錢三萬六千餘貫緣
本州催促嚴峻六月下旬已納及絹五千五百餘匹錢
二萬四千餘貫而守臣唐仲友嗔恚知縣趙公植催理
遲緩差人下縣追請赴州縣人聞之相與號泣遮欄公

植回縣情願各催戶下所欠零稅絹二千五百匹限十日內赴州送納方得放免仲友遂專牒縣尉康及祖催納零欠更不照應三限條法及近日累降指揮牒內明言要在六月終以前一切數足又牒縣尉催淳熙七年八年殘欠官物專差人吏牟穎在縣監督及節次差下承局禁子等人絡繹在道乞覓搔擾無所不至又據寧海人戶論訴本州專差天台主簿張伯溫及州吏鄭椿姜允在縣催督去年殘米下戶丁稅百端搔擾本司見行追問未到而聞張伯溫在寧海縣追呼迫急本縣人戶不堪其擾相與羣聚喧譟欲行歐擊伯溫知之僅得走免臣竊惟台州頻年災傷民力凋弊仲友儒臣幸得蒙恩典郡專以布宣德澤摩撫疲瘵爲職而乃舞智循私動乖仁恕在法夏稅省限至八月三十日下限方滿

近來戶部擅行指揮必要七月盡數到庫已是違法而仲友乃於戶部所促之限又促一月公行文移督迫屬縣頓辱良吏苦虐飢民使千里之人愁怨歎息無所告訴甚失聖朝所以選用賢良惠恤鰥寡之本意又况方此飢饉人心易搖萬一果然生事不知何以彈壓臣雖疎賤誤蒙任使職在刺舉不敢不言欲望聖慈先將仲友亟賜罷黜以慰邦人之望其不公不法事件臣當一面審實以聞須至奏聞者

右謹錄奏聞伏候勅旨

申尙書省狀

具位朱熹

今有狀奏知台州唐仲友促限催稅違法擾民乞賜罷黜事緣在道路次舍淺迫慮有漏泄不敢備錄全文申

尚書省其狀如蒙聖慈降出欲乞早賜敷奏施行以快
千里疲民之憤須至供申

右謹具申尚書省伏乞照會謹狀

按唐仲友第三狀

貼黃

奏爲知台州唐仲友在任不公不法事件除已將干連
人送紹興府司理院根勘錄案奏聞欲乞聖慈將唐仲
友先賜罷黜仍詔有司毋得觀望嚴行究治事伏候勅
旨

此項已追到鐵匠作頭林明供具分明尋別具奏伏乞
聖照

仲友差官非法估沒人戶財產多是差曹格及司戶趙
善德案中可見伏乞聖照

造假會人蔣輝已據通判趙善伋監押趙彥將就州宅後門捉獲臣已押送紹興府司理院傳聞此人在此造作假會甚多其台州解到行在諸庫官會欲乞密遣公正臣寮驗其真僞伏乞聖照

此項已據人戶潘牧繳到仲友長子手簡與弟子王靜內說計囑周士衡論分公事及婦人李六娘訴王靜及弟子鮑雙入宅求囑犯姦公事臣追到王靜鮑雙供通委有取受詣實尋別奏聞伏乞聖照

具位臣朱熹

臣昨兩次具狀按劾知台州唐仲友促限催稅違法擾民罪狀聞奏乞賜罷黜及聞本人更有不公不法事件乞候一面審究以聞臣於今月二十三日到本州密切體訪及先據本州通判申并據士民陳狀皆稱仲友到

任以來少曾出廳受領詞狀多是人吏應褒林木接受財物方得簽押無錢竟不得通以市戶應世榮爲耳目令其在外刺求富民之陰事民間初無詞訴急遣吏卒奄至其家捕以送獄擇姦貪之吏鍛鍊考掠傅致其罪往往徒配或請囑旣行則又忽然縱舍曲直輕重初無定論邦人畏其凶燄無不重足而立又本州違法收私鹽稅錢歲計一二萬緡入公使庫以資妄用遂致鹽課不登不免科抑爲害特甚又抑勒人戶賣公使庫酒催督巖峻以使臣姚舜卿人吏鄭臻馬澄陸侃爲腹心妄行支用至於饋送親知刊印書籍染造匹帛製造器皿打造細甲兵器其數非一逐旋發歸鄉里其他細碎不急之物下至魚鹽臭腐但直一文以上無不津致以歸籠檐動十百計絡繹不絕於路凡此皆人所共見有口

者類能言之臣嘗令本州通判趙善伋取其公庫文曆自二十四日巳午間至中夜不至據監庫官司理王之純及造買使臣姚舜卿供每遇知州判下支單卽時關支出庫所有應干簿籍於今日巳時知州聞得本司勾追馬澄卽時盡行拘收入宅有公庫貼司俞實張公輔吳允中備見之純等曾親往控告知州堅執不肯付出仲友又悅營妓嚴蕖欲攜以歸遂令僞稱年老與之落籍多以錢物償其母及兄弟據司理王之純供今年五月滿散聖節方知弟子嚴蕖王蕙張韻王懿四名知州判狀放令前去卽不曾承準本州公文行下妓樂司照會仲友身旣不正遂不能令其子弟以至白晝公然乘轎出入娼家交通關節受納財賂曾爲羣不逞就娼家歐擊狼狽而仲友不敢問其嚴蕖沈芳之徒招權納賂

不可盡紀其簿曆文字少經倅貳之手惟倚臨海縣

丞曹格及曹官范杉等格妻與之有媿姻得出入其家
早暮無節物論頗醜凡此細碎污穢之迹臣不敢縷陳
以瀆天聽臣謹按仲友身爲儒生早取科目繼登臺省
爲清望官今又蒙恩出守名郡所宜夙夜恪勤正身率
下務以承流宣化牧養小民爲職顧乃不思報稱公肆
姦心其刻核擾民之政旣如臣前奏所述其貪污不法
之狀又如臣今奏所陳而近侍貴臣或未知其所爲猶
以故意期之以至交章論薦上誤寵擢臣以職事所在
恐負使令誠知蹤跡孤危不敢隱情惜己其官屬所言
士民所訴與臣前後所聞大略不異雖其曲折未必盡
如所陳然萬口一詞此其中必有可信者而觀其公然
占吝公庫文曆不肯解送則其衷私折換以蓋日前侵

盜入己之迹亦有不待案驗而可知者臣更不敢差官體究慮涉張皇却致本人潛將文案盡底改易無可供證竊謂唯有付之所司盡實根勘則其有無虛實自不可掩除已牒本州通判趙善伋高文虎拘收本州自仲友到任以後至截日終應干收支文曆公案及將合干人等押送紹興府司理院禁勘外欲望聖慈閱此一方久懼凶害亟詔有司毋得觀望嚴行究治依法施行以爲遠近四方守臣貪殘不法之戒須至奏聞者

一淳熙八年受納秋苗糙米每年是十月半後間開場仲友信委司戶趙善德差爲受納官公然倍取合耗高帶斛面不半月間善德已申所納糙米數足方十一月仲友將人戶未納糙米違法高價一併折錢人戶盡用賤價糶米高價納官一郡皆以

爲苦至今追催所折米錢更不顧恤朝廷上司時
暫住催指揮其收到錢雖入於糴本庫收附多是
關入公庫巧作各色支破私用欲乞委官到州監
合千人供具去年折納糙米月日石數見得不恤
民力一意取錢實迹

一淳熙八年春本州荒歉抄劄諸縣合賑濟人戶姓
名散給未嘗周徧仲友却專委人吏李迴乘勢監
勒鄉司僱具隱落丁稅之人抑勒鄉司乘此作
弊增減其姦計詞訴至今不已每縣添至數千
人多是失實比常年添增五縣丁產絹數千匹在
兩年中納夏稅和買絹未及七分却並高價折錢
困及小民無錢可納增起了稅以無爲有爲一州
無窮之害欲乞委官再行審實早與除豁其所取

到添丁錢並不會起發不審將作何用

一公使庫自來不許賣酒緣添歸正人合支些小供給錢仲友到任以來以此爲名公庫每日貨賣生酒至一百八十餘貫煮酒亦及此數一日且以三百貫爲率一月凡九千貫一年凡收十萬餘貫其所造酒米麥之屬旣並取於倉庫羨餘而所收息錢大半不會收附公使庫錢曆並是入己

一自到任以來緣公庫賣酒錢額旣高督責兵官尉司逐日捕捉私造酒麴及糴糯米糯穀者所犯之家與四鄰盡是籍沒貲產以充自立賞錢格所犯止於升合亦不能免兩年中破壞二千餘家其間久繫囹圄染疫而死者甚多所犯甚輕並出私意文致其罪至於徒配如兵士盧宗之類闔郡軍民

冤恨無一日安迹

一公庫所入舊例並支見任官員逐月供給及宴會之屬自兩年來却以糴本庫錢撥入軍資庫軍資庫撥入公使庫以支供給公庫之錢既富乃巧作名色以饋送爲名多至五百貫少至數十貫專委公庫手分馬澄支行及書表司楊楠僞作書劄送與官員封角了當却供入宅堂又其間婺州親戚如妻之親兄何知縣何教授其子之妻父曹宣教其表弟高宣教者甚多止宿郡齋爭受關節以此頻作宴會無不預坐留連數月臨行饋送各以數百千及去年十一月次子娶婦凡供帳幘帟染破紫綾羅絹凡數百匹從人衣衫數百領樂妓衣服並是什物庫陸侃支公使庫錢往仲友私家婺州

所開綵帛舖高價買到暗花羅并瓜子春羅三四百匹及紅花數百斤本州收買紫草千百斤日逐拘繫染戶在宅堂及公庫變染紅紫其妓弟四十餘人都行首嚴葉分真紅暗花羅餘行首分瓜子羅其餘分春羅每人分俵真紅大袖帔子背子紅裙衫段幃子各一副一州驚駭自來未嘗有知州爲妓弟製造衣服各件不一違法如此盡是父子踰濫以此取媚其餘所染到真紅紫物帛並發歸婺州本家綵帛舖貨賣其子親會宴集經月姻族內外一文以上皆取辦於公庫其妓弟今夏又分紗帛衣各件並如前

一仲友專委司戶趙善德兼管公庫前後妄自支使並無合破名色條例善德將滿遂密獻計以收買

米麴物料爲名於今年二月上旬一日之間支錢
二萬貫皆是入己並無他處簿書收附證照
一司戶趙善德兼管糴本庫今年二月上旬忽支落
十餘萬貫以轉運司差官點檢且欲移寄他庫爲
名此項錢後來卽不見起發亦不見拘收並無下
落

一仲友專委人吏鄭榛陳忠充財賦司凡官賦所入
其間有不該係省及諸庫收附者盡是別作名色
支破差人往外州買銀子及收到來卽不知將作
何用及就本州置買銀場逐日監繫舖戶稍違限
期無不重斷多是以所賣公庫生酒錢支買不曾
附曆先是司戶趙善德及二胥吏同謀作弊逐時
於公庫以犒賞爲名支錢遺賂善德一歲至二三

千緡其妾用錢物甚於泥沙不可明說其兩吏所支亦數百貫

一仲友少曾坐廳受領詞狀間有判下人戶論訴皆係應褒林木接受忽自宅堂傳出盡是子弟同坐商議判詞其父子或自相爭執弟妓早晚出入宅堂公然請囑每事皆有定價多至數千緡又縱獄吏百端乞覓民間冤苦不可勝言

一仲友自到任來本性喜引致姦私公事或告首事不干己或幃箔曖昧不明或僧道與人有冤並行受領皆欲窮究根底並不憑信獄官推司所勘自引歸花園中亭館及宅堂後宴坐去處親自鞠問語言穢媠吏卒羞聞當面露示其合該刑名至重之意其弟妓與心腹人吏住持鄉僧等內外相通

同共請托取受貨賂不可勝計並是子弟專決其所諾不副者雖已釋去復行追繫增其刑名所需既滿者刑名雖重結案之後平白不斷如僧景猷犯姦事道士祝元善亦預景猷富厚責賂甚重不能應其所需則籍沒其衣鉢莊產之屬祝元善因栖霞知宮姓李者以彈琴出入宅堂首以厚賂徑達未斷間先令放出竟不斷罪李承節之妻爲應揚所犯乃外甥犯從舅母或佃者犯主母干連十餘人臨斷時得二千緡平白不斷富室黃士龍黃日新更易其妻穢不可言並自引上親勘既受其物至今不斷凡此等事皆顯然人所共知者

一兩獄直日收禁罪囚羅織枝蔓不容獄官依法裁處須令逐日過廳取稟己意以爲輕重高下每事

多是曲法枉斷緣此拘繫既多致死百餘人全不顧恤

一仲友在鄉開張魚鯨舖去年有客人販到鯨鮭一缸凡數百筵更不容本州人戶貨買並自低價販般歸本家出賣並差本州兵級般運其他海味悉皆稱是至今逐時販運不絕

一仲友自到任以來關集刊字工匠在小廳側雕小字賦集每集二千道刊板既成般運歸本家書坊貨賣其第一次所刊賦板印賣將漫今又關集工匠又刊一番凡材料口食紙墨之類並是支破官錢又乘勢雕造花板印染斑禰之屬凡數十片發歸本家綵帛舖充染帛用

一仲友因修造兵器前後發買牛羊皮穿甲及生絲

一 打弓弩弦支破不可勝計其牛羊皮買來甚少錢亦不歸所買生絲除量支作弓弩弦用外並發歸本家綵帛鋪機織貨賣

一 仲友又因修造兵器自造精細鐵甲數副及弓弩刀鎗各十數件收入宅堂不知將作何用

一 本州新報恩寺元有住持僧誣以他罪逐去却請鄉僧介登來此住持早晚出入宅堂傳度關節凡五縣僧寺易換住持幾遍盡是介登保明乞差通同接受貨賣每處必數百緡其中皆是婺州富僧近又有應世榮者亦作士戶狀陳乞卽時給帖其無忌憚容小人紊亂郡政一至於此

一 仲友自到任以來違法招刺廂兵每一名必立定價外寨兵士一百貫在城兵士止三五十貫下至

學院子修合醫人刊碑刊版工匠弟妓廚子各得干預請求去年七月間有外寨兵士經州下狀告論兵士周榮託仙居縣丞楊浩齎錢一千貫囑本官廳子轉求刺軍十名事雖送有司緣錢入己竟不追究有案狀可驗若刷具仲友自到任以來刺過廂兵人數可照所受錢數

一本州販香牙人應世榮姦猾小人因其家資稍厚左右引置以曾與仲友建立生祠乃延爲上客與之頌贊親自題寫世榮乃刻石誇張因此妄作聲勢出入宅堂仲友專一信委爲心腹牙爪凡首姦獲酒盡是世榮發之仲友却令臨海縣丞將帶兵卒數十人追捕每一如此闔郡搔擾驚走其他挑起事端及報其私冤羅織平人寘於重憲不可勝

數所斷輕重並出世榮己意全無州郡雖士大夫善人之家亦被凌襲郡人指爲殃禍其人取受前後不可計數每事所得必與其子弟分受若非送有司勘其情犯編配遠惡去處何以贖陷害鄉土善良無窮之罪

一臨海縣丞曹格係仲友長子妻黨其人凶暴貪婪全無忌憚自仲友到任倚恃至親之故妄作聲勢凌侮同官捶撻胥吏凡士大夫不問見任寄居無不遭其譖訴以其妻出入郡齋日有醜惡之聲傳播一郡公然不時出入宅堂或入其子舍傳度關節百端取受并仲友長子之妻父曹宣教者卽曹格之堂兄往來曹格之家通同干預公事全無顧藉仲友弟婦兒女婦姪不時往曹格之家飲燕媾

狎無禮靡所不至全無廉恥其曹格日來縱橫尤甚每年受納官物皆干求差預百端阻抑人戶所納之物絹必接撥令破綿子曬或經月米麥必十來日宿倉又多取合耗人之冤苦無所告訴似此姦猾小吏輒敢憑藉聲勢苦虐士民可不明正典刑

一仲友有三子長曰士俊次曰士特士濟及其甥姪數人隨侍來此自到任見客則立於屏側引問公事則環於坐隅與胥吏混立紛然干預有簽押決遣各出己意不容其父下筆多因賄賂先入其父不止明知有公受其欺者是非曲直一切反戾其父子各據弟姪三子多出入王靜沈玉張嬋朱妙沈芳之家盤合簡帖絡繹道路本州士民有得

其子所與第妓書簡受關節者亦曾連粘投狀訴
于提刑行司

一仲友自到任以來寵愛第妓遂與諸子更相踰濫
行首嚴夔稍以色稱仲友與之媾狎雖在公筵全
無顧忌公然與之落籍令表弟高宣教以公庫轎
乘錢物津發歸婺州別宅嚴夔臨行時係是仲友
祖母私忌式假却在宅堂令公庫安排筵會餞送
嚴夔近來又與沈芳王靜沈玉張嬋朱妙等更互
留宿宅堂供直仲友洗浴引斷公事多是沈芳先
入私約商議既定沈芳親抱仲友幼女出廳事勸
解仲友僞作依從形狀卽時寬放如應揚犯姦等
事並是臨時裝點此等情態本州亢旱啓建祈雨
道場安撫司文牒傳奉聖旨令精意祈求非不嚴

切仲友却追拘收外縣弟子十餘人及散樂二三十人逐日出入宅堂以下碁彈琴爲名公然於道場前往來一日寄居士民在儀門下修設水陸道場其長子士俊自臨海縣丞曹格家醉歸帶挾弟妓數人於本處觀視嬉笑歌唱無所不至士庶嘆恨皆云太守如此兒子又如此如何會有兩澤感應又因斷屠日仲友却令公廚供造法煮雞鵝蹄肚食物入宅堂其長子士俊又以盤合乘貯生料猪羊水雞之類送與行首王靜人皆驚駭緣此百姓忿怒因士俊鬪游無節公然捶打於弟妓家更不敢根究

一仲友有婺州隣近人周四會放煙火其妻會下碁仲友招換來此遇作州會以呈藝爲由每次支破

公庫錢酒計十餘貫前後支過錢約數百貫妻常
出入宅堂下某仲友却委放煙火人探聽外事如
犯姦首酒等事亦是此人在外邀求稍不如意卽
時挑發其間又有在婺州喚到刊字碑塑佛工匠
十餘人壁截郡治堂屋安歇支破公庫錢物供贍
專是在外探刺生事

一仲友造置浮橋破費支萬餘貫官錢搔擾五縣百
姓數月方就初以濟人往來爲名及橋成了却專
置一司以收力勝爲名攔截過往舟舡滿三日一
次放過百端阻節搜檢生出公事不可勝計此項
若不早與奏聞行下廢罷却是本州添一稅場遺
害無窮向去復有掎刻之人因而增添收稅課額
若一兩政循襲必不肯廢此大係利害橋成未及

一年已收過力勝錢二千五百餘貫見有簿曆可照

一仲友貪墨無恥素乏廉稱到官之初適見公使庫有前政積下官錢十餘萬貫遂有席卷之意乃擇姦猾使臣姚舜卿爲監官并與公庫手分馬澄日夕握手密謀將公庫諸色官錢巧作名色支破變轉官會並用竹籠盛貯入宅輒先令其子節次作文字行李擔押歸前後幾數萬緡皆有實跡及染造真紫色帛等物動至數千匹皆用官錢託以人事爲名逐旋發歸以爲貨賣之資其他不急之物往往稱是乞追姚舜卿馬澄並帳設庫專知陸侃送清強官司勘鞠便見著實今來旣得改除歸鄉行李亦數百擔他可知矣有雕匠姓蔣人因造

假會事發永康縣差人密來擒捕仲友輒令兵卒
劫取反將承差人送獄絀打永康縣無如之何徑
申提刑司牒本州發遣仲友輒作本人身死備申
至今尙在本州其不遵法度皆此類也

右其通判及士民所述仲友罪狀謹件如前謹錄奏聞伏
候勅旨

晦庵先生朱文公文集卷第十八

福州府儒學訓導舒鏊校